

Polis involvi den ladroncia di go-fast a bay off den Corte:

"Tur e cos aki ta un coy loco e ta anto!"

ORANJESTAD (AAN): — E polis Regston R. di 32 aña di edad lo sigui deteni den KIA te dia cu su caso bin dilanti den Corte riba 29 di April pa 8:30'or di mainta, asina Huez a dicidi ayera. E decision a obviamente spierta gran frustracion cerca R., kende a sorprende hende dor di diripiente bay off den Corte.

E yiu di Curacao R. a contesta Huez: "Kier meen cu tur e cos aki ta un coy loco e ta anto! Pakico bo ta wanta mi si e persona ta bisa cu no tabata ami y SETAR bisa cu no tabata mi telefon?!". Sinembargo, mes abrupto cu su explosion di palabra a start, el a stop y R. a lanta na un forma brusco for di su stul y bira lomba bay laga Huez cu palabra den boca.

Boto di Strandpolitie----- Regston R. ta deteni relaciona cu e caso di ladroncia di e boto di Strandpolitie y di e go-fast "Screamer" riba 18 di November 2004 y tambe di un pistol, uniformnan, un portofoon, luz, yabinan y un verrekijker di Cuerpo Policial Aruba.

Fiscal a bisa cu si en caso no keda comproba cu R. lo ta involvi den e ladroncia, e ta acuse di a sirbi como complice di e sospechonan Fernando F., Jean-Pierre P. y Israel P. y di a yuda nan dor di informa nan tocante e quehacernan y e orario di Strandpolitie, di a muestra nan

unda e yabinan ta warda y di a duna nan e uniformnan pa nan usa.


Te ainda e investigacion den e caso aki no ta totalmente cla y Dialuna awor lo tin un reunion entre Ministerio Publico y Polis tocante e listanan di e yamadananan telefonico cu a wordo haci entre e sospechosonan riba 17 y 18 di November.

Contacto telefonico----- Abogado Chris Lejuez tabatin dos razon ayera pa pidi pa Huez laga su cliente bay. E prome tabata cu e listanan di yamadananan a muestra e siman aki cu no tabatin ningun contacto telefonico entre e sospechoso Jean-Pierre P. y su cliente o su señora, manera e Venezolano Fernando F. a insisti durante interrogacionnan na Warda di Polis. E di dos motibo ta cu F. a

cambia su declaracionnan y a asegura Huez Comisario riba 14 di December cu loke el a bisa prome tocante R. no ta berdad.

Fernando F. a declara na dos diferente ocasion (riba 19 y 25 di November) cu el a yama R. na celular di Jean-Pierre P. na momento cu e no tabata por a start e boto di Strandpolitie y cu e polis a splike kico e mester haci y cua boton e tin cu primi. Na December sinembargo, el a bisa Huez Comisario cu el a yama R. despues cu el a start e motor y ora nan tabata na caminda caba pa busca e go-fast.

Cambia declaracion----- Segun Fiscal, cu F. a cambia su declaracion no ta kita nada for di e caso, pasobra sa sucede mas biaha cu sospechosonan ta haci esey despues di bin den contacto cu otro den KIA.



F. y Regston R. tabata amigo di otro y señora di e Venezolano a bisa Polis cu nan tabata papia constantemente di un "hecho cu nan tabata di bay haci". E "hecho" aki lo tabatin di haber cu e situacion financiero malo di ambos, particularmente di R., cu lo tabata den necesidad di cen. Fiscal a afirma cu tin mas prueba cu ta muestra cu e contactonan tabatey y cu e intencion tabata pa horta e go-fast y bende na Venezuela. Pa loke ta e numbernan di e celularnan di R. y su casa cu

no ta parce riba e listanan di yamadananan, e impresion ta cu e polis tabata usa un di tres telefon.

Huez a muestra di ta de acuerdo cu Fiscal cu hopi biaha sa pasa cu sospechosonan ta bisa si prome y djey no, sigur despues di a topa otro den KIA.

Den opinion di Huez, tin indicacion fuerte cu R. ta involvi den e asunto aki. E lo laga na e Huez cu lo trata e caso riba 29 di April pa dicidi ki valor ta duna na e declaracion cambia di F. y si tin suficiente prueba o no.

EYRIBA NO TA DRUMI!!



BEST DEAL

Tel: 5827100

(Pariba di Aruba Bank, Paradera)

BEST SHOPPING DEAL

Turibana Plaza

Tel: 5865455



Magic Sweep

Afl: 35,=